

La langue de chez nous (Yves Duteil)

Arrangement en namurois de Chantal Denis.

C'è-st-on foû bia lingadje qu'on cause après nos-ôtes
Qui raconte sès racènes au d' truviè d' sès patwès
Qui cause come one tchanson èt sint bon come one vôte
Qui d'chind dins vosse gosî come on vêre di pèkèt.

Do fond dèl Picardîye jusqu'au coron dèès Fagnes
E tot choûtant causer lès djins d' nosse Walonîye
Vos dîrîz qu'on bon vint s'a pris dins l' bwès d' Marlagne
Èt qu'il ènn'a rèchu one tote bèle mèlodîye.

Èt dins ç' bia lingadje-là qu'a l' coleûr di l'Ârdène
Sintoz l' bon gos' di laume, di bons frûts ou d' vèrdeûs
Di miscoterîyes, di waufes, ou d'orèyes di bèguènes,
Dès mots qu'ont stî fwârdjîs pa nos vayants bouteûs.

C'è-st-on tot p'tit lingadje qu'a passé l'Atlantique
Po qu' nos tayons cinsîs î vayenuche fé leû nid
Èt waurder bin vikants lès mots èt leû musique
En s' raxonant al chîje tot causant d' nosse payis.

Nos causans platèzag po nos fé bin comprinde
Mins, ci n'èst nin po ça qu'on n' cause nin polimint.
Nos-avans on lingadje qui mèrite qu'on l' disfinde
Avou tos sès r'vazîs po l' flori simplumint.

N's-avans chake nos ritchesses po dîre ç' qu'on-z-a à dîre
Eto nos difèrinces di Lîdje à Châlèrwè,
Mins faut yèsse pèrcé fwârt po conèche lès frontîres
N's-èstans tot l' minme tortos, dès-èfants da Tchantchès.

C'è-st-on lingadje qui môwe come on tauvia d'ârtisse
Èt maugré tot faît rîre èt sint voltî vos pôds
Nos-aprind nos-ûsances, qui cause avou franchise
Et tchante come on pinson quand on l' maîstri voltî.

C'est dîre qu' c'è-st-à mauvau si on l' riwaîte di crèsse
C'è-st-on foû grand lingadje qu'on-z-a traîtî di p'tit
Portant quand on l' conèt, c'è-st-one fameûse ritchèsse.
I rapèle nos djoûs d' fièsse qu'ont tortos leû londi.

Èt dès corons d' Mâmedi tot d'chindant j'qu'à Djodogne
On dîreûve qui lès mots d' nosse pitite Walonîye
Tot passant pa Nameur, Châlèrwè ou Bastogne,
Âront faît su pont d' tîmps one tote grande sinfonîye.

Èt dès corons d' Mâmedi tot d'chindant j'qu'à Djodogne
On dîreûve qui lès mots d' nosse pitite Walonîye
Tot passant pa Nameur, Châlèrwè ou Bastogne,
Âront faît su pont d' tîmps one tote grande sinfonîye.